

„დინამო“ (თბილისი) – „შახტიორი“ (დონეცკი) 2:0 (1:0).

თბილისი. ვ. ი. ლენინის სახელობის „დინამოს“ სტადიონი. 30 აპრილი.

„დინამო“: გაბელა, კეტაშვილი, თევზაძე, ჭელია, არზიანი, ტყეშელაშვილი, ცვიბა (კორღალიძე, 65), სულაქველიძე, მ. ჯიშკარიანი (შენგელა, 60), გურული, გ. ჯიშკარიანი.

„შახტიორი“: შიშოვსკი, დრაგუნოვი, სოპკო, ლეონოვი (გომპოდერია, 21), ვესევი, სვისტუნი (გერასიმეცი), იაშჩენკო, იურჩენკო, პეტროსოვი, სმოლიანინოვი, კობოზევი.

მსაჯი ა. კირილოვი (მოსკოვი).

ახლა, როცა განვლილია საკავშირო ჩემპიონატის მერვე ტურის შეხვედრები, ზოგიერთი გულშემატკივარი დაუფარავად გვსაყვედურობს მიმომხილველებსაც და სპეციალისტებსაც, რომ წლევანდელ ჩემპიონატში ნაადრევად და უსაფუძვლოდ შევედეთ თბილისის დინამოელთა ქებას, ავანსად გავეცით კომპლიმენტები მაშინ, როცა ჩვენი გუნდი ადრინდებულად კვლავ სუსტად თამაშობს. მის ოფიციალურ მატჩებში არავითარი პროგრესი არ იგრძნობა, ხოლო რაც შეეხება დინამოელთა გამოსვლებს მეტოქეთა მიმდევრებზე, აქ, საერთოდ, ძალზე ცუდადაა საქმე. საკმარისია ჩვენმა გუნდმა დატოვოს თავისი სტადიონი და გულშემატკივარი, რომ დამარცხება მას გარანტირებული აქვს.

მაგრამ, რა თქმა უნდა, ეს მთლად ასე არაა. პროგრესი შარშანდელთან შედარებით აშკარად იგრძნობა. თბილისის „დინამოს“ კოლექტივი 1987 წლის სეზონის დასაწყისთან შედარებით გაცილებით უფრო მობილიზებულად, ენერგიულად და სტაბილურად თამაშობს. საქმე მარტო ის არაა, რომ შინ ჩატარებული ორი მატჩის შემდეგ თბილისის „დინამო“ სათავეში ედგა ჩემპიონატის სატურნირო ცხრილს და შინ, ელემენტარულად, უფლება არ გვექონდა გვეთქვა გუნდი კვლავინდებურად ფსკერზე იმყოფებაო. უბრალოდ, საფეხბურთო ლოგიკა გვკარნახობდა ჩვენს გუნდში მომხდარ სასიკეთო ძვრებზე, რომელთა დაუნახაობა და მიმალვა არ შეიძლებოდა. დინამოელები შარშანდელთან შედარებით გაცილებით უკეთ გამოიყურებოდნენ ფიზიკური და ფსიქოლოგიური მომზადების თვალსაზრისით, ეს უკვე აღარ იყო უნებისყოფო გუნდი, რომელიც პირველივე წუთებიდან უბრძოლველად უთმობდა სარბიელს მეტოქეს. აშკარად განწირული იყო წაგებისთვის, მთელი შემართებით, თავგამოდებით იბრძოდნენ ვეტერანები და ის ახალგაზრდებიც, რომლებსაც ახლოდან რომ დააკვირდეთ, მხოლოდ სიჭაბუკის პირველ კვალს თუ შეამჩნევთ სახეზე. მაგრამ ამ ორი ტურის შემდეგაც ცხადი იყო, რომ ტაქტიკური და ტექნიკური მომზადების თვალსაზრისით, დინამოელები მაინც შორს იყვნენ მათთვის შესაფერისი ტრადიციული

კონდიციებისგან და ჯერ კიდევ ბევრი, ძალზე ბევრი მუშაობა მართებდათ საერთო სპორტული ოსტატობის ასამაღლებლად. ვუშინ ლიდერი იყო, სალიდერო თამაშისთვის კი ვერ მიეღწია. ამაში თბილისის „დინამოს“ კრიტიკოსები ნამდვილად მართალნი არიან.

ის, რაც შემდგომ ტურებში მოხდა, ყველამ კარგად იცის. ნაკლოვანებებმა ცხადად იჩინა თავი. სტუმრად ჩატარებული მატჩები წავაგეთ. მერე ამას შინ დამარცხებაც დაემატა. როგორც ჩანს, მრავალწლიანი, ღრმა კრიზისიდან თავის დაღწევა ასე იოლად, ხელის ერთი მოქნევით არ ხდება. მდგომარეობის გამოსწორებას დიდი დრო სჭირდება და თბილისის „დინამოს“ მომხრეებმა თავიანთი პრეტენზიები და სურვილები რეალურად უნდა შეუფარდონ გუნდის პრაქტიკულ შესაძლებლობებს.

აი, მაგალითად, 30 აპრილს საკმაოდ სოლიდური ანგარიშით დავამარცხეთ დონეცკის „შახტიორი“, დინამოელთა უპირატესობა აშკარა იყო, მაგრამ ვინ იტყვის, რომ ეს გამარჯვება თბილისის „დინამოს“ სრულ აღორძინებას ნიშნავს გავიმარჯვეთ, რასაც დიდი შრომა და ენერჯია დასჭირდა. ტექნიკური და ტაქტიკური პრობლემები ჩვენი გუნდის წინაშე კვლავ და კვლავ მთელი სიცხადით დგას. ისევ უფერულად და უუნაროდ მოქმედებდა ნახევარდაცვა. კვლავ შეცდომები ჰქონდათ მცველებს. მეტოქის კარის იერიშის დროს კი წინა ხაზზე თითო-ოროლა თავდამსხმელი თუ მონაწილეობდა. შეტევას აკლდა სწრაფი, მოულოდნელი ხასიათი. როცა გოლის გატანის რთულ და შრომატევად საქმეში მრავალი მოიერიშე ფეხბურთელი უნდა მონაწილეობდეს.

დონეცკის „შახტიორი“ უმაღლესი ლიგის ერთ-ერთი უძველესი ბინადარია. მის შემადგენლობაში სხვადასხვა დროს ძლიერ ფეხბურთელებს უთამაშიათ, მაგრამ ეს გუნდი უმეტესად გამოირჩეოდა შესაშური ნებისყოფით, კოლექტიური მონოლითურობით, უდიდესი ბრძოლისუნარიანობით: „შახტიორთან“ გამარჯვება მუდამ უაღრესად ძნელი იყო ყველასთვის. ამჯერად კი დონეცკელთა გუნდი ძალზე უფერულად, შეუთამაშებლად და ზოგ შემთხვევაში, უსუსურადაც კი გამოიყურებოდა. ასეთი სუსტი „შახტიორი“, გვეგონია, არც გვინახავს, აშკარად სუსტად ითამაშეს ლეონოვმა, სვისტუნმა, პეროვმა, სმოლიანინოვმა, ევსეევმა და სხვებმა. ასე რომ, უკეთესი ანგარიშითაც შეგვეძლო გაგვემარჯვა.

სწორედ მეტოქის სისუსტის ფონზე კარგად ჩანდა, რომ თბილისის „დინამოში“ აშკარად დაბალ დონეზე დგას პასის კულტურა იქ, სადაც გადაცემა უკიდურესად ზუსტი და გამოზომილი უნდა იყოს. ჩვენი ფეხბურთელები უყურადღებობას და უზუსტობას იჩენენ, ბურთი უმეტესად მეტოქის მისამართით იგზავნება. ამიტომაცაა, რომ ზოგიერთები, განსაკუთრებით ახალგაზრდები, გადაცემას ინდივიდუალურ გარღვევებსა და დრიბლინგს არჩევენ და როცა გუნდი მთელ თამაშს უმთავრესად დრიბლინგზე და გარღვევებზე წარმართავს, ეს მოთამაშეთა არასათანადო კვალიფიკაციაზე მეტყველებს.

დინამოელებს კარში დარტყმის რამდენიმე კარგი შესაძლებლობა მიეცათ. ეს იყო საუკეთესო საგოლე მომენტები. მაგრამ გადამწყვეტი დარტყმები ძალზე არაზუსტი, ნაჩქარევი იყო. ესეც ჩვენი გუნდის პასივად უნდა მივიჩნიოთ.

თბილისის „დინამოს“ ამ მატჩში საკმარისი უპირატესობა ჰქონდა, მაგრამ დროდადრო დონეცკელებიც ახორციელებდნენ კონტრიერიშებს. ასეთ სიტუაციებში, ვიმეორებთ, „დინამოელთა“ მცველებისა და ნახევარმცველების დაცვითი მანევრები მთლად უნაკლო არ იყო.

ასეა თუ ისე, თამაში მოვიგეთ (ბურთები გაიტანეს გურულმა - პენალტით და შენგელიამ). ჩემპიონატის ამ ეტაპზე დიდად საჭიროა პოზიციების გამაგრება გათამაშების ცხრილში და ამ ამოცანის შესასრულებლად თბილისის „დინამომ“ არაფერი არ დაიშურა დონეცკის „შახტიორთან“. ვფიქრობთ, იგი მაქსიმალური მონდომებით იბრძოლებს დღესაც „შახტიორზე“ გაცილებით უფრო ძნელ და ძლიერ მეტოქესთან დნეპროპეტროვსკის „დნეპრთან“. „დნეპრი“ ჩვენი უახლოესი მეზობელია სატურნირო ცხრილში. მასთან გამარჯვება ჩვენს გუნდს კარგ სატურნირო პერსპექტივას შეუქმნის.

**„ლელოს“ ფეხბურთის განყოფილება**